

2020-mi akileraarutitigut ilanngaatissat il.il. imatut angissusilerneqarnissaannik Inatsisartut aalajangiiffigisassaattut siunnersuut:

1. Inummut ilanngaat.....kr. 48.000 (ukiumut)
2. Ilangaat aalajangersimasoq.....kr. 10.000 (ukiumut)
3. Aningaasarsiat B-t akileraaruteqaataasussaannigitsut.....kr. 5.000 (ukiumut)
4. Killilimmik akileraartussaataasunut ilanngaat.....kr. 1.000 (ukiumut)
5. Kommunitut ataatsimut akileraarut.....6%

Akissuteqaat

(Aningaasaqarnermut Nunanilu Avannarlerni suleqatigiinnermut Naalackersuisoq)

Aappassaaneerinnineq

2021-mi akileraarutitigut ilanngaatissat il.il. angissusilerneqarnissaannik Inatsisartut aalajangiiffigisassaattut siunnersuutip aappassaaneerneqarnissaanut Aningaasaqarnermut Akileraartarnermullu Ataatsimiititaliap isumaliutissiissuteqarneranut Naalackersuisut qujapput. Siunnersuut akuerineqassasoq ataatsimiititaliamit isumaqatigiissimasumit inassutigineqarmat Naalackersuisunit iluarisimaarneqarpoq.

Ataatsimiititaliap inummut ilanngaatip qaffanneqarnera pillugu nassuiaammik qinnuteqarnerattut paasissutissiissutigisinnaavara, inummut ilanngaat 1.000 kr.-nik allanngorpat isertitassanut tunngavigineqartunut 44 mio. kr.-nik allannguuteqartitsissavoq. Inummut ilanngaat 4.000 kr.-nik qaffappat taava isertitassanut tunngavigineqartut 176 mio. kr.-nik appassapput, assigivaa kommunit aamma Nunatta Karsiata akileraarutitigut iluanaarutai 75 mio. kr.-t missaani apparneranut. Inummut ilanngaat 8.000 kr.-nik qaffanneqarpat isertitassanut tunngavigineqartut 352 mio. kr.-nik appassapput assigissavaalu iluanaarutit 151 mio. kr.-nik apparneranut.

Inummut ilanngaat ukiut sisamat ingerlanerani 8.000 kr.-nik arriitsumik qaffanneqaqattaarpat, taava assigissavaa ukiumut 37 mio. kr.-nik aningaasanut inatsimmut aningaasaliinissaq pisariaqassasoq.

Tamanna piviusorsiorpasinngilaq inuiaqatigiit agguataarnerat malillugu nalinginnaasumik aningaasartuutitigut isigigaanni. Covid-19 aamma peqqutigalugu aningaasaqarnikkut kinguarierneq tamatumunnga ilungersunartumut iluaqutaanngilaq.

Tassunga atatillugu aamma qimerloornissaanut pisariaqarpoq, inummut ilanngaammik taama annertutigisumik qaffaaneq kommunit akileraarutitigut isertitaannut annertuumik appartitsissasoq.

Maanna aningaasaqarnikkut inissisimanermi Naalackersuisut qanoq, taakku qaffaanerit pisortat sullissinermi akilersuutaannit annertuumik sipaarnani aningaasalersorneqassanersut isigisinnaanngilaat.

Aningaasaqarnermut Akileraartarnermullu Ataatsimiititaliap akileraartarnermut aaqqissuusseqqinnikkut suliaq nangeqqikkusuppaat. Naalakkersuisut piumasaqaammut paasinnipput, tassungalu atatillugu erseqqissarusuppara, ukiut ingerlanerini suliniutinik akileraartarnermut aaqqissuusseqqinnerusinnaasunik naammassinnittoqarsimasoq. Soorlu taasinnaavara sulinermi akileraarutinut ilanngaata, nunani allani pensionisianut aaqqissuussanut akiliutigisat akileraarusersorneqarnerat, Ilanngaassivik aamma ingerlatseqatigiiffiit akileraarutaanik appaaneq. Taakku suliniutinit misilittakkat ersersippaat, isumatusaarnerusoq immikkoortukkuutaarlugit suliniutit ingerlannissaannut, suliniutinillu nutaanik pilersitsinnginnissaq aaqqissuusseqqinnerit inissinnginneranni.

Ataatsimiititaliap isumaliutissiisummi kommunit 2021-mi akileraarutitigut ilanngaatit pillugit oqaaseqarnissaanut piffissaliussaq apeqqutigivaat. Iisimatinneqassaaq, 5. december 2019-imi tusarniaanermut allakkiamik nassiussisoqarsimasoq 20. januar 2020-mut piffissaliunneqartumik. Piffissaliussaq naammattutut isigineqarpoq, suliallu takutippaa kommunit tamatumunnga akerliliisimangitsut.

Taama oqaaseqarlunga aalajangiiffigisassatut siunnersuut akuerineqassasoq Naalakkersuisunit inassutigineqarpoq.